

САНХҮҮГИЙН ЗОХИЦУУЛАХ ХОРООНЫ ТОГТООЛ

2010 оны 08 дугаар
сарын 25-ны өдөр

Дугаар 235

Улаанбаатар хот

Г “Нако түлш” ХК-ийн өрийг хувьцаагаар г
сольж нэмж үнэт цаас гаргах тухай

Санхүүгийн зохицуулах хорооны эрх зүйн байдлын тухай хуулийн 6.1.1, 6.2.2, Үнэт цаасны зах зээлийн тухай хуулийн 7.1, 7.2, Компанийн тухай хуулийн 25, 39 дүгээр зүйл, Санхүүгийн зохицуулах хорооны 2009 оны 38 дугаар тогтоолоор батлагдсан “Нийтэд санал болгон худалдах үнэт цаасыг бүртгэх, анхдагч зах зээлд санал болгох, худалдах тухай журам”-ын 7.1 дэх заалт, “Нако түлш” ХК-ийн 2009 оны 01 дүгээр тогтоолыг тус тус үндэслэн Санхүүгийн зохицуулах хорооноос ТОГТООХ нь:

1. “Нако түлш” ХК -ийн нийтэд санал болгон гаргасан энгийн хувьцааны тоог нийт 1.615.721 /нэг сая зургаан зуун арван таван мянга долоон зуун хорин нэгэн/ ширхэг энгийн хувьцаагаар нэмэгдүүлэн үнэт цаасны бүртгэлд нэмж бүртгэхийг Үнэт цаасны газар /Э.Ганбат/, Хөрөнгийн биржийн жагсаалтад бүртгэхийг “Монголын хөрөнгийн бирж” ХК /Р.Содхүү/, Үнэт цаасны төвлөрсөн хадгаламжид бүртгэхийг “ҮЦТТТХТ” ХХК /Т.Гандулам/-д тус тус үүрэг болгосугай.

2. “Бидисек” ХК-иас “Нако түлш” ХК -д олгосон нийт 74.735.550 /далан дөрвөн сая долоон зуун гучин таван мянга таван зуун тавин/ төгрөгийн зээлийн өрийг 2010 оны 9 дүгээр сарын 16-ны өдрийн 01 тоот “Хувьцаанд хөрвөх зээлийн гэрээ”-нд заасны дагуу хувьцаа тус бүрийг 229 төгрөгийн худалдах үнээр тооцон нийт 326.356 /гурван зуун хорин зургаан мянга гурван зуун тавин зургаан/ ширхэг хувьцаагаар сольж, өмчлөх эрхийг бүртгэхийг “ҮЦТТТХТ” ХХК /Т.Гандулам/-д үүрэг болгосугай.

3. “Эм ити эф” ХХК-иас “Нако түлш” ХК-д олгосон нийт 25.000.000 /хорин таван сая/ төгрөгийн зээлийн өрийг 2009 оны 11 дүгээр сарын 02-ны өдрийн 02 тоот “Хувьцаанд хөрвөх зээлийн гэрээ”-ний дагуу хувьцаа тус бүрийг 229 төгрөгийн худалдах үнээр тооцон 109.170 /нэг зуун есөн мянга нэг зуун далан/ ширхэг хувьцаагаар сольж, өмчлөх эрхийг бүртгэхийг “ҮЦТТТХТ” ХХК /Т.Гандулам/-д үүрэг болгосугай.

4. Нэмж гаргах замаар нийтэд нээлттэй худалдах 1.180.195 /нэг сая нэг зуун наян мянга нэг зуун ерэн таван/ ширхэг энгийн хувьцааг нэг бүрийг нь 229 төгрөгөөр нийтэд худалдахыг зөвшөөрсүгэй.

5. Энэхүү тогтоолын 2, 3-т заасан хувьцааг тухай бүрийн зээлдүүлэгчийн өмчлөлд шилжүүлэхийн өмнө болон энэ тогтоолын 4-т заасан хувьцааг нийтэд нээлттэй худалдахын өмнө тус компанийн хувьцаа эзэмшигчдэд хувьцааг тэргүүн ээлжинд худалдан авах эрхийг эдлүүлсүгэй.

6. Энэ тогтоолын 5-д заасан тэргүүн ээлжинд худалдан авах саналыг энэхүү тогтоол батлагдсан өдрөөс хойш ажлын 30-аас доошгүй хоногийн хугацаанд хүлээн авах, улмаар хувьцааг тэргүүн ээлжинд худалдан авах арилжааг нэгдсэн журмаар зохион байгуулж ажиллахыг “Монголын хөрөнгийн бирж” ХК /Р.Содхүү/, “Нако түлш” ХК /Ж.Бат/, “Бидисек” ХК /Д.Даянбилгүүн/-д тус тус үүрэг болгосугай.

7. Энэ тогтоолын 2, 3-т заасан хувьцааг зээлдүүлэгчээс бусад хувьцаа эзэмшигч худалдан авсан тохиолдолд уг хөрөнгийг зээлдүүлэгчид ажлын 20 хоногийн дотор шилжүүлж холбогдох тооцоог хийж дуусгахыг “Нако түлш” ХК /Ж.Бат/-д үүрэг болгосугай.

8. Энэ тогтоолын 4-т заасан нэмж гаргаж буй хувьцааны анхдагч зах зээлийн арилжааг өмнө гаргасан хувьцааны хоёрдогч зах зээлийн арилжаанаас тусд нь зохион байгуулах, анхдагч зах зээлийн арилжааг энэхүү тогтоолын 6-д заасан хугацаанаас хойш 30 хоногт багтаан дуусгах, хувьцаа борлуулсны орлогыг “Нако түлш” ХК-ийн дансанд байршуулж ажиллахыг “Монголын хөрөнгийн бирж” ХК /Р.Содхүү/, “ҮЦГТТХТ” ХХК /Т.Гандулам/, “Нако түлш” ХК /Ж.Бат/, “Бидисек” ХК /Д.Даянбилгүүн/-д нарт тус тус үүрэг болгосугай.

9. “Нако түлш” ХК-ийн дүрмийн санг 161.572.100 /нэг зуун жаран нэгэн сая таван зуун далан хоёр мянга нэг зуун/ төгрөгөөр нэмэгдүүлэх, хувьцаа нэмж гаргасантай холбогдуулан компанийн санхүүгийн тайланд нягтлан бодох бүртгэлийн холбогдох хууль, стандартийн дагуу өөрчлөлт оруулахыг “Нако түлш” ХК /Ж.Бат/-д үүрэг болгосугай.

10. Нэмж гаргах хувьцааны танилцуулгыг зохих журмын дагуу баталгаажуулахыг Үнэт цаасны газар /Э.Ганбат/, баталгаажуулсан танилцуулгад тус Хорооны зөвшөөрөлгүй аливаа өөрчлөлт оруулахгүй байх, энэ тогтоолын 6-д заасан хугацаанд олон нийтэд үнэ төлбөргүйгээр танилцуулж, өөрийн байгууллагын веб хуудсанд байнга байршуулж ажиллахыг “Монголын хөрөнгийн бирж” ХК /Р.Содхүү/, “Нако түлш” ХК /Ж.Бат/, “Бидисек” ХК /Д.Даянбилгүүн/-д тус тус үүрэг болгосугай.

11. Өрийг хувьцаагаар солих ажиллагааг хэрэгжүүлж дууссанаас хойш гүйцэтгэлийн тайланг 30 хоногийн дотор тус Хороонд ирүүлэх, мөн уг тайланг нийтэд мэдээлэхийг ““Нако түлш” ХК /Ж.Бат/-д үүрэг болгосугай.

12. Цаашид хувьцаанд хөрвөх нөхцөлтэйгөөр бусдаас аливаа санхүүжилт авч өр үүсгэхээс өмнө асуудлыг урьдчилан Хороонд танилцуулан шийдвэрлүүлж, гарсан шийдвэр, өр төлбөр үүсч буй явцын талаар нийтэд тухай бүр шуурхай мэдээлэхээс гадна өр төлбөрийн гүйлгээг заавал компанийн харилцах дансаар дамжуулан гүйцэтгэж байхыг “Нако түлш” ХК /Ж.Бат/-д анхааруулсугай.

13. Үнэт цаасны зах зээлийн тухай хуулийн 10 дугаар зүйл болон Санхүүгийн зохицуулах хорооны 2007 оны 206 дугаар тогтоолоор батлагдсан “Үнэт цаасны зах зээлийн мэдээллийн нэгдсэн сангийн тухай журам”-д заасан мэдээллийг цаг тухайд нь тогтмол ирүүлж, хууль тогтоомжоор хүлээсэн үүргээ чанд биелүүлж ажиллахыг “Нако түлш” ХК /Ж.Бат/-д үүрэг болгосугай.

14. Улсын бүртгэлийн ерөнхий газарт 10 хоногийн дотор мэдэгдэж, тогтоолын биелэлтэд хяналт тавьж ажиллахыг Үнэт цаасны газар /Э.Ганбат/, олон нийтэд мэдээлэхийг Тамгын газар /Н.Удаанжаргал/-т тус тус даалгасугай.

ДАРГА

Д.БАЯРСАЙХАН